

Un finto matrimonio

Personaggi in scena

DAVOS: servo di Simone

SIMO: padre di Panfilo

CHREMES: padre della promessa sposa di Panfilo

- 580 DAVOS Ad te ibam. SIMO Quidnamst?
DA. Quor uxor non accersitur? Iam advesperascit. SI. Audin?
Ego dudum non nil veritus sum, Dave, abs te ne faceres idem
quod volgus servorum solet, dolis ut me deluderet
propterea quod amat filius. DA. Egon istuc facerem? SI. Credidi,
585 idque adeo metuens vos celavi quod nunc dicam. DA. Quid? SI. Scies;
nam propemodum habeo iam fidem. DA. Tandem cognosti qui siem?
SI. Non fuerant nuptiae futurae. DA. Quid? Non? SI. Sed ea gratia
simulavi vos ut pertemptarem. DA. Quid ais? SI. Sic res est. DA. Vide:
numquam istuc quivi ego intellegere. Vah consilium callidum!
- 590 SI. Hoc audi: ut hinc te intro ire iussi, opportune hic fit mi obviam. DA.
Hem
numnam perimus? SI. Narro huic quae tu dudum narrasti mihi.
DA. Quidnam audio? SI. Gnatam ut det oro vixque id exoro. DA. Occidi.
SI. Hem
quid dixti? DA. Optume inquam factum. SI. Nunc per hunc nullast mora.
CHREMES Domum modo ibo, ut adparetur dicam, atque huc renuntio.
- 595 SI. Nunc te oro, Dave, quoniam solus mi effecisti has nuptias...
DA. Ego vero solus. SI. Corrigere mihi gnatum porro enitere.
DA. Faciam hercle sedulo. SI. Potes nunc, dum animus inritatus est.
DA. Quiescas. SI. Age igitur, ubi nunc est ipse? DA. Mirum ni domist.
SI. Ibo ad eum atque eadem haec quae tibi dixi dicam idem illi. DA.
Nullus sum.
- 600 Quid causaest quin hinc in pistrinum recta proficiscar via?
Nil est preci loci relictum: iam perturbavi omnia:
erum fefelli; in nuptias conieci erilem filium;
feci hodie ut fierent, insperante hoc atque invito Pamphilo.
Em astutias! Quod si quiessem, nil evenisset mali.
- 605 Sed eccum ipsum video: occidi.
Utinam mi[hi] esset aliquid hic quo nunc me praecipitem darem!